

Vihmaz Gou Bienq Lo

我为什么变了

□ Cinz Lisinh / 覃丽新

Ngoenzneix hwnj dangz go cozvwnz, daezmoeg dwg 《Boux Lauxsae Ndawsim Gou》. Gou ngamq gangj it ngeih aen iugouz raiz cozvwnz, couh mizmbangj hagseng youq baihlaj cici coco gangjsebseb. Gangj sat, gou hawj gyoengq hagseng doxgangj gij seiloh cihgeij gonq, caiq doengh bit sij gauj.

Raen gyoengq hagseng mwngz coenz gou gawq, gangj ndaej hoengh lumj gwnzhaw nei. Gou byaij roengzbae dingqdingq. Miz di gig rox naemj: Dingh ndei sij boux lauxsae lawz, caiq gangjgangj bouxde maj ndaej baenzlawz yienh, gij saeh de youh miz di lawz…… Hix miz doengh boux lij caengz ra ndaej roenngex, naengh youq gwnzeij song fwngz dengi hangzgauq cingq yawj dienvabanj ngaengxngwdngwd. Gou byaij gvaqbae daezsingnaeuz: “Naemjnaemj miz boux lauxsae lawz hawj mwngz yaenq-siengq cei q laeg? Bouxde bingzseiz maij guh maz, lumjnaeuz lauxsae yijvwnz bingzseiz miz cungj biujeingz lawz?” “Fatheiq!” Boux doengzhag baihlaeng yot han sing ndeu, gij sing de youh hung youh coi q. Fwt gou nyinhnaeuz coenz vah coi qcwctwt neix, couh lumj fag cim soemset coeg haeuj ndawsim gou daeuj.

Ngeihcib bi gonq, gou ngamq yamq hwnj gyangjdaiz sam cik dang lauxsae, daxboh couh daengq sam daengq sei q: “Gai q faexbien ndeu, song diuz faenjbit, sam cik gyangjdaiz…… Baezlaeng aeu caeuq gyoengq hagseng caemh hag caez lienh, nem faenh hong sonhag doengz maj nw!” Gou geiq- maenh gij vah daxboh, mbouj lumz aen sim hainduj gou vihmaz dang lauxsae, itcig youq diuz roen sonhag haenq guh gaenx guh.

Seiz lij caengz dang lauxsae, gou hix dwg boux hagseng, youq ndaw hagdangz fouz you fouz lawq, caenh-guenj yiengjsouh gij gyaeh daxboh daxmeh diemzsubsub; dang lauxsae le, aen hagdangz dwg giz dieg gou byaij hwnj byaij roengz, caemh lij causim doengh gij saeh hung saeh iq hagseng. Caengz dang lauxsae seiz, gou dwg

lwglwnz ndaw gyangfwngz bohme; dang lauxsae le, ndaw gyangfwngz gou miz gyoengq lwglwnz caj gou bae ganq. Caengz dang lauxsae seiz, baez daengz ok dou cungj sien ciuq gingq cang ndang, ndawgingq yienh’ ok faj naj riunyum le couh okdou; dang lauxsae le, loenglauq ndaej ciuq gingq saek baez, fatyienh boux ndawgingq faj naj lumj riu mbouj riu, caemh lumj seiznit naj gyaengj noh heu. Yi? Vihmaz gou bienq lo? Gou youq ndawsim cam cihgeij.

Go cozvwnz roengzdangz lo, boux hagseng dawz bonj cozvwnz ngamq sij ndei diuqbumbum daeuj daengz dangqnaj gou, yienh bonj cozvwnz gvaqdaej hawj gou yawj: “Lauxsae, gou dwg sij mwngz ne.” Raen de naj riunyumnyum, gou fan hai bonj cozvwnz daj goek yawj roengzbae. Ngamq yawj ndaej song sam rangh, gou caen daejriu mbouj baenz ne—— “Yijvwnz lauxsae gou rox bienq, ngoenz bienq geij baez, mizseiz riu, mizseiz hei qgaenj ndaej dingjgyaeuj hwnj feiz…… De miz ‘sam aen gyaenq roek cik gen’ ……” Gou ndawsim ngeix hwnj ngeix roengz: “Neix dwg sij gou ha?” Gou cienq gvaqbae cam bouxde: “Mwngz neix mbouj dwg sij Sunh Vugungh ha? Miz sam aen gyaenq? Roek cik gen?” Boux hagseng iet fwngz gag lumh-lumh laenggyaeuj, gazdwdwd gangj: “Daxmeh gangj lauxsae caeuq de doxdoengz miz sam aen gyaenq roek cik gen.”

“A?” Gou ngeixvae g laebdaeb yawj roengzbae—— “Lauxsae ngoenz-naengz aeu guh haujlai hong: Hawj dou hwnjdangz, bang dou gai q cozyez, roengzdangz le lij aeu guenj dou gaej luenh gyaep luenh buet…… De couh gaen daxmeh gou doxdoengz, ngoenz-ngoenz aeu guh haujlai hong, fwngz ga mbouj ndaej dingz, lij mbouj rox baeg mbouj ndaej yiet”. Yienzlaiz gij hong gou moix ngoenz guh, doengh boux hagseng mizsim cungj ngonz youq ndawda, geiq youq ndawsim.

Gou hix geizheih cihgeij moix

ngoenz guh ndaej baenzlai hong, boux vunz ndeu gingqyienz guenj ndaej ndei roekcib boux hagseng. Doengh-baez guh hagseng, gou boiqfug gvaq lauxsae yienghyienh guh ndaej diuzleix faenmingz, dang lauxsae le, gou guh saeh hix mbouj vueng mbouj muengz, guenj ndaej gijliz, leix ndaej hagsib. Mizseiz haeuj ban, soengz hwnj gyangjdaiz, song da baez “sauq” gvaqbae, aen ban hoenghhwdhwd sikhaek bienq ndaej caemrwrwg. Vihmaz gou bienq lo? Gou youq ndawsim cam cihgeij.

Ndwenngoenz gou bienq lo. Yienzlaiz cij miz bohme daeggo dahcej, seizneix cungj dwg gou caeuq gyoengq hagseng. Doenghbaez yaek dang lauxsae, gaen bohme gangj ndei moix ngoenz cuengqhag dauqranz loengh ngaiz caj gyoengqde dauqranz, couhmoz buenx gyoengqde bae haw…… Dang lauxsae le, cuengqhag le ciengzciengz mbwn laep cij dauqranz, daengz ranz couh naengh haeuj daiz gwn caeuz. Ngoenz couhmoz, gou mbouj dwg bwh go couhdwg guh gogen, nyaengq neix nyaengq de, hix mbouj miz seizgan buenx bohme okdou. Aeu gij vah bohme gangj, gou dang lauxsae le, gyoengq hagseng ndawban cungj ciemq rim gij ndwenngoenz gou:

Hagseng cinbu gou sim’ angq, hagseng famh loek gou simgip. Ngoenznaengz gou cungj lauhei q hwnjdangz mbouj gangj liux gyoengqde hag mbouj ndaej, cozyez gai q mbouj liux mbouj ndaej gibseiz rox gyoengqde hag ndaej baenzlawz, gijliz mbouj guenj ndei gyoengqde roengzdangz doxgyaep loengh sieng lune……

Ndangfaenh gou bienq lo. Caengz dang lauxsae cij rox lauxsae son hagseng hag cihsiz couh ndaej lo. Seizneix dang lauxsae le, gou cij nyinh cihgeij couhdwg bohme daihngaih gyoengq hagseng, yienghyienh re, lohloh guenj. Boux neix baizdoih seiz gyaenq ngunh daengxlaemx ra yenzynh, boux haenx bae lah raemx buhvaq dumz aeu rieg, songde vih di saeh nyangqbak caemh doenghfwngz hwd hwnjdaej aeu cek, bouxde bit coq youq ndawban mbouj raen aeu ra…… Gij simvuen sim’ angq simnai q simyou gyoengqde, gou aeu rox aeu guenj, caemhcai q riengz seiz riu seiz you.

Seiz mbwq caeuq doengzsaeh ndaw bangunhsiz dwen gij saeh gyoengq hagseng sij gij cozvwnz, gyoengq doengzsaeh cungj naeuz gyoengq hagseng neix caen rox siengj. Gou rox dwg gyoengq hagseng ndawban hawj gou bienq lo, gou cij maj ok “sam aen gyaenq, roek cik gen” daeuj; dwg faenh hong lauxsae hawj gou bienq lo, gou cij mbouj rox naetnai q. Baezlaeng gou aeu laebdaeb guh ndei faenh hong neix, cengdi youq gwnz diuzroen sonhag caeuq gyoengq hagseng doengzcae z bienq hung bienq ak.



Gij gingsaek Vujsenh Yen Sunghyangj Suijgu.

Loz Cuzhdwz inq

·Sawcuenhvaez Lwngnye z·

Gij Golwngnye z Henz Dahhoengz

红 水 谣

□ Lanz Haijyangz Moz Beibei / 蓝海洋 莫蓓蓓

Simjmehvej mwhneix gaenq rwngh caez, ing youq gwnz congz, rag vengqbuh goemq bak doek raemxda.

“Gij ywdoj haxbaenh de gwn ne.” Bohgoux cam.

“Youq ndaw ranzcauq.”

Gou rag bohgox byaij coh ranzcauq.

Gou biengj hai farek gwnzcauq, naeuz: “Gij ywdoj neix aeu aeuq gwn, haxbaenh gaenq hawj Ahvej gwn vanj he gvaq.”

Bohgoux dawz gouh dawh deuj nyinghaex ragnywj ndawrek, gungj hwet di he di he menhmenh cimyawj, ndawbak namnam niemh gij cohyw: “Neix dwg mbawcuko iq, neix dwg golae, neix dwg……maz? Neix dwg cehgocoengh ha? Yi?!”

“Baenzlawz?” Gou maeuq youq henz yawj bohgox, gou cij rox bohgox rox di yw, aenvih de seizi q gaenq youq ndaw bouqyw guh lwgsae, ngoenzneix cij rox de caen miz bonjsaeh bw.

“Cehgocoengh, van manh miz doeg, ndaej vaq nong siu doeg, yw baez ceih foeg, mbouj ndaej seizbienh

gwn haeuj bak……” Bohgox sawq-mwh gveng dawh, ndwn hwnjdaej naeuz, “Lungzgeiz baenzlawz ndaej yienghneix guh, cehgocoengh baenz-lawz ndaej dap golae gwn ne? Cai q mbouj doq gouq dungxsaej cungj yaek naeuh bae lo.”

“Bohgoux!” Gou lau ndaej nyengh lo, fwngz ndeu rag genbuh

bohgox cam: “Dwg gij ywdoj miz doeg? Aulungzgeiz daegdaengq yaek haih Ahvej?”

Bohgoux fid gengoenh, yamq hung byaij ok ranzcauq, gangj coenz vah ndeu: “Lwngnye z rox maz?”

Gou ndwn youq henz loz iq, itseiz mbouj miz cawjeiq lo.

(caengz sat)